

Mud Volapüka

Nüm 77

6 tobul 2017

Bukemaboed

Fövot lekoned-mära yutopik
„Ventürs hiela ‚Nenolikan‘ e flenas omik“
fa hiel „N. N. Nosov“

Kapit teldegvelid. Kolköm no peniludöl.

Blümükam baola äjenädon duniko. Priel pro musigalef e buigs zü danüda=piad=il ya pi=bumons. Kölamarüd äbepänom prieli ad figurs valasotik küpädik, ab hicilils votik äbepänoms buigi ad köls valik reinaboba. Jicilils ädekofs piadili me flors,lampians e stänils vala=kölik [vieliks]. Nenolikan äzi=jutedom usio ed isio ed älebüdom töbidiküno. Äjinos kol om, das vob äjenädon vemo nevifiko. Ävokädom, ämufedom e te ätupom valikanis. Läbo valikan äsevon nen etan utosi, kelosi muton dunön.

Ek edatikon ad jafön e pladön bam=ilis zü piadil, ab boeds ädefons. Nenolikan äprimikom ad sesleitön heris se kap okik demü säspetikam.

„Liedö!“ - ävokädom atan - „No ilü=blinoy boedis zuik, ab nu toods valik idetävons lü Kaitöp! Ekö, obreikobsös buigi seimik. Ujafobs bamis de on.

„Verätö!“ - Baülan evokädom ed ya äjutedom labü cüd lü buig nilikün.

„Nö!“ - Kölamarüd esagom. - „Ga äbumobs, poso äbepänobs onis lunüpo, e nu nedos ad breikön-li onis üfo?“

„Atos no mäniotilon oli!“ - Baülan ävokädom. - „Bams koo binons zesüdiku.“



„Ab ga no kanos ad jafön bosì e breikön votikosi!“

„Ab kikodo guvol is?“ - Nenolikan evüikom. - „Kim binon cifiku bevü ogs: ol-li u ob-li? If ebüdom ad breikön, tän breikolsöd!“

No ämogos ad büosagön: feit at ad kis ufijenonöv<, ab ettimo tood epubon fago.

„Luibül ege≠vegom!“ - valikans ävokädons frediko. - „Nu mögos ad lü≠veigön boedis e no zesüdos ad breikön buigi.“

Tood elü≠mufon [enilikon]. Luibül esedranom se spadäd tooda. Lövikan nog bal epubom pos etan. Valikans stuniko älülogedons lü om.

„Godö! Ga atanu binom Nolikan obsik!“ - sanan: Pilulülan< evokädóm.

„Nolikan ekömom!“ - Perönülan ävokädóm.

Hicilils sunädo ezüoms Nolikani, äbradoms ed äkidoms omi.

„Fino efi≠tuvobs oli!“ - äsagoms.

„Vo-li efituvols obi?“ - Nolikan estunikom. - „Obo [bai ced obi], güä efituvob olis!“

„Si, si, veräto, ab äniludobs, das ibelüväbol obis!“

„Vo-li ibelüväbob olis?“ - Nolikan dönu estunikom. - „Obo, güä ibelüväbols obi!“

„Ga isebunol ko falajelöm, ab äbllibobs [pö bälun].“ - Bastetül egesagom.

„Ab kikodo äbllibols? Ga ibüedob sebungön olis valik. Änedos ad sebungön po ob, bi bälun ga ya no äkanob lai≠flitön, ab, bo, ägeyilols.“

„Si, si, ädredöfobs...“ - valikans äsioms kapo.

„Lesi, ädredöfobs!“ - Nenolikan esagom. - „Ägeyilobs ad sebungön.“



Binos nitediku ad tūvön utani, kel igeyilon büiküno.“

„Kin?“ - Boülan esäkom. - „Bo, ga igeyilol-la büiküno.“

„Ob-li?“ - Nenolikan estunikom.

„Lesi, ob!“ - valikans ävokädons siölo. - „Ga kim isagom, das no nedos ad sebunön? Vo-li ob?“

„Si, ob.“ - Nenolikan ecdasevom atosi. - „Ab kikodo ilobedols obi üfo?“

„Verätö!“ - Nolikan esmililom. - „Meni kinik ilobedols! Vo-li no sevols, das Nenolikan binom cuku [menu löniälik, stupik]?“

„Benö.“ - Nenolikan edäsperikom - „Nu klülädos, das binob cuku!“

„I [binol] dredälanu.“ - Sirupül eläükom.

„Zu binol lugan.“ - Bastetül efövom.

„Kitimo älugob?“ - Nenolikan estunikom.

„Ab kin ästeton, das idatikon bäluni?“ - Bastetül esäkom.

„Nö, nö!“ - Nenolikan änoom. - „Idatikob bäluni nonik. Nolikan idatikom bäluni.“

„Ab kin ästeton, das binon cifiku bevü obs?“ - Sirupül ädränom Nenolikani.

„Leno binob cifiku! Binob te... Leno äbüdob.“ - Nenolikan ägidilükom oki.

„Denu no demobs oli! Nu Nolikan binom cifiku bevü obs!“ - Sirupül älai=vokädöm.

Jicilils, kels älelilofs spikoti at, eprimofs ad smilön laodiko. Edasuemofs, das Nenolikan binom pleidülanu komunik. Glügakrovül e Tubilül sunädo emo=rönofs ad konön valikanes, das Nenolikan eklülädöm binön luganu e, das leno om ab Nolikan idatikom bäluni.

Blövalogikan elü=golof lü Nenolikan ed esagof ludigidälo [nestümiko]:

„Kikodo äbelugor obis? Äkredobs ori, äcedobs,



das vo binor visedik, ritiku ä kuradiku, ab eklülädor binön luganu miserabik e dredälanu nestümabik!“

Pleidiko ede=flekof oki de Nenolikan ed elügolof lü Nolikan, zü kel jicilils mödik ya ekobikofs. Ji=utans valik älabof nitedäli ad logedön omi e leilön utosi, kelosi äkonom.

„Sagorös: vo-li, das if flitoy pö bälun, täno tal donü jinon labön gretoti mö [leigoäs] kek?“ - Yatülan ebesäkof Nolikani.

„Nö, atos ne=veraton.“ - Nolikan egesagom. - „Tal binon vemo gretiku ed if ulöpikoyöv ad löpot alseimik gretikum, tän tal ojinon nog gretikumo, bi dulogam ocenon ad veitikum.“

„Plidö, sagorös: vo-li lefogs binons vemo solidiku ed änedors pö flitam du=cöpön onis me cüds?“ - Blövalogikan esäkof.

„Atos koo neveraton.“ - Nolikan egesagom. - „Lefogs binons moliku äs lut, bi binädons me fog, kludo leno nedos ad cöpön onis me cüd.“

Jicilils äbesäkofs Nolikani: vo-li bäluns pa=blado=svolükons me stem, vo-li bälun kanon flitön gü=flekiko, vo-li kü etans äflitoms flod äkomon mö grads mil e degdil bal. Nolikan egesagom, das atos valik neveraton, ed esäkom:

„Kin inunon stupotis at oles?“

„Atanu Nenolikan binom.“ - Lievülan egesagof ed eprimof ad smilön.

Valikans elü=flekons okis lü Nenolikan ed eprimons ad smilön laodiko. Nenolikan eredikom demü jem ed ävilom ad dufalön da glun. Emo=jutedom ed eklänedom oki ini fotül tarakas.

„Okropob ini taraks [dü tim anik], pas täno atans uglömons jenoti at ed usegolob [isao].“ - Nenolikan esludom.



Nolikan vemo ävilom dalogön Grünazifi. Blövalogikan, Nifaflogülan e jicilils votik ädugädofs omi ad jonön ome logöfotis valik [topis nitedik]. Nolikan staböfo elelogom poni love flumed, pos atos älelogom vata- dugodemi jugik. Binod vatadugodema e fonedas vemo änitedälükons omi. Jicilils prolidiko ekonofs ome binodi vatadugodema e vio nedos ad bumön fonedis dat vat osefonon no donio ab löpio.




Vemo ämagädos pö Nolikan, das jicilils valöpo älabofs leodi dasamik e klini lölöfik. Elobom ofis demü utos, das tegofs igo pärunavegis pö süts me tapädils. Jicilils vemo äfredofs [demü lob at] ed ävüdots Nolikani ini doms oksik, dat olelogom ninis onas. Nino [ninü doms] koo äbinos koveniko e kliniko leigoäs plödo. Pö dom semik Nolikan eküpom ramari ko buks ed esagom, das koo umekom bukaramari pro ok.

„Vo-li no labor bukaramari?“ - jicilils esäkofs.

„Nö.“ - Nolikan esiom.

„Kiöpio plador bukis orik üfo?“

Nolikan äseilom demü jem. No äkünom ad koefön, das buks omik seatons noe ebo su tab, abi dis tab ed igo dis bed.



Fe Nolikan id älabom demädi pö vatameluns. Jicilils äkonofs ome dö jiel ‚Stolülan‘ e Nolikan eprimom ad vilön kosikön ko of. Jicilils etuvofs Stolülani ed ekosükofs ofi ko Nolikan. Nolikan ädasäkom ofi dö valikos, tefü kel änitedälom. Stolülan ekonof ome vobodi okik ad bridön flukis e härbatis valasotiks. Nolikan ädalilom vemo küpäliko ed igo änüpenom bosu ad peneta=buks=il okik.

„Hicilil kio=visedik.“ - jicilils äsagofs. - „Klülü löfilom ad studön bosu.“

Ab Nenolikan fe no äkanom sufälön ad kropikön [stadön] pö fotül tarakas. Semiknaiko äsegolom [usao], ab äsufom badikosi. Jicilils äbeiädofs [leno äküpofs] atani, äsua no dabinom, ab hicilils äpöjutoms omi.

„Nenolikan binom cütanu!“ - etans ävokädoms. - „Nenolikan binom pleidülanu! Nenolikan binom dredälanu!“

„Nö, klülädos, das no nog eglö moy [atosi]!“ - Nenolikan faviko ätikom ed äge=jutedom ini taraks.

Pos tim anik dönu äsegolom ed atos valik dönu äjenädon. Fino esagom [esludom]:

„Denu no plu osegolob! Nedos ad fümälön. Okropikob-la fümiko is igo jüi odel. Usegolob no büä baol ujenikon.“



Reidolsös fövoti konota pö nüm fovik.